

2 TIMOTEO

Timoteodih ã túyat túutat

¹ Weém, Pablo, Jesucristoíh doonádih Dios ã naáwát túutni jumna, nin núodih meém Timoteodih wã jwúub daác wahna caá. “Nihat Jesucristodih jepahnit wãjeéh ĩ túi jumbipna caá”, ã niijátjidih bitadih Dios weemdíh ã naóh bohéát túutur jĩ. ² Timoteo, wã wũúh panihni ma jumuchah, meemdíh búdí wã oina caá.* Dios jwĩ íp, jwĩ Maáh Jesucristo biíc dih meemdíh oinit, ĩ jíghah en teo wáaca naáh, ma túi jummat pínah niijná.

Pablo Diosdih “Túina caá”, ã niiját

³ Diosdih úúbhna, yeó jáap, chei jummat pahbut meemdíh wã úúbhna caá. Pánih úúbhnit, “Timoteodih búdí ma teo wáacatdih túina caá, Paá”, wãpĩ niijná caá. Caán Diosdih tigaá jwĩ nuowã wēinit, ĩpĩ jepahat pahjeh muntih, weembút caandíh wēinit, wã jepahna caá. Pánih jepahnit, dedé yeejép chājat peéh weemdíh ã wihcatdih wã jéihna caá. ⁴ Con láa meemdíh wã cádah bejehah, ma juñátjidih náhninit, majeéh jumnit, túi weñat túut niijná, meemdíh wã jwúub eníhna caá. ⁵ Meém Jesús dih ma túi jenah joyátdih wã náhnina caá. Ma éet Loida, ma ĩn Eunicebut Jesús dih ĩt jwíh jepahap tajĩ. Pánihna, queétdih en yacnit, meembút caandíh ma túi jenah joiná caá.*

⁶ Meemdíh wã teo jáha úúbúchah, Dios meemdíh ã wēpatdih búdí át wũhup jĩ, ã wutat pah bitadih ma túi teo wáacat pínah niijná. Páant ã chājatjidih náhninit, úumcanjeh, ã wēpatjĩh bitadih chah ma teo wáacá. ⁷ Dios

* 1:2 Hch 16.1; 1Ti 1.2 * 1:5 Hch 16.1

jwiít dih Túini Espíritudih át wēhup be, jwījeéh ā jumāt pínah niijná. Pánih jwījeéh jumni Túini Espiritu jwiít dih búdí ā teo wáacna caá, cáacwā ded pah ī jenah joyátdih jwī úumcat pínah niijná. Páant ā teo wáacachah, cáacwā dih oinit, ā wēpatjih queétdih jwī jéh teo wáacna caá. Caán Túini Espiritujeh jwiít dih ā túi jenah joyát túutna caá. ⁸ Pánihna, jwī maáih doonádih bitadih naóhna, ma tíic jenah joicá bojóó. Weém áih doonádih wā bohéat jíib nemat muúboó wā jumuchah, wā chéen ma jumatdihbut ma tíicca bojóó. Obohjeéhtih, túini doonádih ma bohéat jíib meemdihbut yeejép ā yapachah, “Ā túimi nacaá”, ma niijí. Páant ā yapachah, Dios meemdih ā teo wáacipna caá, caandih ma cádahcat pínah niijná. ⁹ Jwiít iiguípna bejnit déejidih Diosjeh jwiít dih át túi ubup wut jī. Pánih túi ubnit, jwiít dih át níwip wut jī, áihwā jumnit, jwī túi chājat pínah niijná. Obohjeéhtih, jwī túi chājat jíib át níocap wut jī. Nin baácdih ā chājat pínah játih ā jenah joyátji pah jwiít dih oina, át níwip wut jī. Pánih oina, jwiít dih túi ubni pínah Jesucristodih ā wah deyaat pínahdih át jenah joyóp wut jī. ¹⁰ Pánih jenah joiníji caandih wah deyana, ā oyatdih jwiít dih ā túi jéihyana caá. Páant ā wah deyani Jesús jwiít áihwā dih iiguípna jwī bejat déejidih át túi ubup wut jī. Caán Jesús dih jepahna, páantjeh Diosjeéh jwī túi jumāt pínah doonádih jwiít dih naáwádih át dei jūwúp wut jī.

¹¹ Weemdih nífonit, Dios ā wahap jī, caán túini doonádih wā naáwát pínah niijná.* ¹² Páant ā wutatdih wā jepahatji jíib buu nin nemat muúboó jumnit, yeejép wā yapna caá. Obohjeéhtih, pánih yeejép yapna yuhna, wā tíic jenah joicán caá. “Wā jepahni Jesús túi wēpni jumna, áih doonádih naáwát túutnit, weemdih ā túi teo

* 1:11 1Ti 2.7

wáacbipna caá. Páant ã teo wáacachah, púú ã jwúub dei jüúwúchahna, caandíh túi jenah joí cádahcan, páantjeh áih doonádih wã naóhbiipna caá”, wã niíj jenah joiná caá.

¹³ Meémboó Jesucristodih túi jenah joiná, caandíh oinit, meemdíh yoobópdih wã bohéátji pah ma chãj cádahca bojoó. ¹⁴ Jwíjeéh jumni Túini Espíritu ã teo wáacatjîh Dios meemdíh ã naáwát túutnidih yoobópdih ma bohénaá. Caandíh túi náhninit, mácah ma bohéca bojoó.

¹⁵ Nihat Asia baácđih moón Jesúíhwã weemdíh cádah tigaá it chãjap. Pánih tigaá í jwúub jígohcáp. Íjeéh Figelo, Hermógenes wût jumnitbut í cádahatđih ma jéihna caá. ¹⁶⁻¹⁷ Páant queét nihat weemdíh í cádahachah yuhna, Onesíforoboó dawá láa weemdíh enedih jumínít, ã túi weñanap be. Nemat muúboó wã jumuchah yuhna, Roma tútchiboó jumínít, wã chéen ã jumatđih tíic jenah joicánjeh, weemdíh maatápdih bidniji weemdíh ã bid juyúp jí. Páant weemdíh ã túi teo wáacat jíib, ã déewáđih jwí Maáh ã jígah en teo wáaca naáh. ¹⁸ Éfeso tútchiboó jwí jumuchah, weemdíh búdí ã teo wáacatjídihbut ma túi jéihna caá. Pánihna, jwí Maáh Jesúsđih búdí wã úúbhna caá, nin baácboó jwúub dei jüóhnit, caandíh búdí ã jígah en teo wáacat pínah niijná.

2

Jesúíh túini soldado panihni

¹ Meémboó, wã wúúh panihni, Jesucristo meemdíh oinit, ã teo wáacachah, caandíh ma túi péenaá. ² Dawá wã bohéátđih joiníji meem jwúh bitadih ma bohénaá. Páant queétđih ma bohénachah, Dios ã náahat pah túi chãjnit, bitadih bohé jéihnitbut í jumú naáh.

³ Soldadodih búwat ã jumuchah yuhna, ã cádahcat pah muntih, meemdíhbut bíic yoobó ã yapachah, Jesúsđih

ma cádahca bojoó. Jwiít nihat Jesúíhwādh biíc yoobó ã yapna caá. ⁴ Ded soldado ã maáhdih weñáíhna, ã wútat pahjeh caá ã chājap. Soldado nihcanni ã chājat pínahdih páantjeh chājna, ã maáh ã wútat pah āta jéih chājcan tagaá. Pánihna, soldado ã chājat pah muntih, meembút Dios ã weñat pínahdihjeh jenah joinít, ã wútat pah ma túi chājaá. ⁵ Pánihat dée, ded ñáoni maáta í wútat pah túi chājnijeh, ã wēp ñáwat júbdiñ ã jéih bíbohna caá. Pánihna, ñáoni ã túi chājat pahjeh muntih, Jesucristo ã wútat pah ma túi chāj cádahcat júb, ã pebhna ma júbínachah, meemdíh túinidih ã wūhbiñna caá. ⁶ Pánihat dée muntih, wápchi túi teoniboó ã tewat júb jeémátdih jwíih bíbohat caá náahap. Pánihna, Dios meemdíh ã wútat pah ma túi chājat júb, ã pebhboó ma júbínachah, meemdíh wēinit, ã túi chājbiñna caá. ⁷ Wā niijátjidih ma túi náhninaá. Páant ma náhninachah, jwí Maáh meemdíh ã túi jéihyabiñna caá.

⁸ Ded pah Jesucristo ã jumátjidih ma quíib buudcá bojoó. Caán maáh David juima át jumup wut jí. Wunna yuhna, ã jwúub boo pud jūwátji túini doonádih wápí bohénap jí. ⁹ Pánih caandíh wā bohéat júb, yeejép chājnitdih í nemat pah, weemdíh ítah tōpjíh chéonit, nemat muúboó í nemechah, wā moh yéejna caá. Pánih jumna yuhna, Dios naáwátdih wā bohé cádahcan niít. ¹⁰ Dios ã níonitdih bohéna, yeejép wápí yapna caá, queébtut Jesucristoíhwā í jumát pínah niijná. Áíhwā iiguípná bejnit déejidih ã túi ubnit pínah í jumuchah, queét Diosjeéh í túi jumbiñna caá.

¹¹ Nin naáwát yoobópdih caá:

Cristo jwí yéejat júb ã wun wūhat pah muntih, jwiítbut ájeéh wunnit panihnit, yéejatdih cádahnit jwí jumna caá. Pánih cádahnit, ájeéh jwúub boo pud jūóhñit panihnit, ájeéh páantjeh jwí jumbiñna caá.

- ¹² Áihwā jwī jummat jíib yeejép yapna yuhna, ã náahat pah jwī chāj cádahcan, ã maáh jummapboó caán bíicdih jwiítbüt maáta jwī jumbipna caá.* Obohjeéhtih, “Jesucristodih wã jéihcan caá”, jwī niijíchah, caanbüt jwiítbih bíic yoobó ã niijbípna caá.*
- ¹³ Jwiít jwī niijátji pah jwī chājcah yuhna, caánboó ã niijátji pahjeh ã chājbiipna caá. Yeecanni jumna, ã niiját pahjeh chājni ã jumna caá.

Diosdih túi teo wūhni ded pah ã jummat

¹⁴ Majeéh jumnit Jesúíhwādih bütéh wã naáwátbih ma túi náhnianaá. Dios ã enechah, queétdih ma míic jūihcat túutú. Í jenah joyátjihjeh í míic jūihñuchah, dedé pínah nihcan caá. Pánih jūihna, teo wáaccan, míic yéejana caá í chājap. Í míic jūihñatdih joinít, í bəwa jenah joiná caá.

¹⁵ Dios naáwátbih túi jéihnit, caán meemdíh ã wutat pah, bitadih áih túini doonádih yoobópdih ma bohénaá. Páant ma chājachah ennit, “Ma túi chājna caá”, Dios ã niijíchah joinít, ma tíccan níit.

¹⁶ Diosdih jéihcannitboó í jenah joyátjihjeh í míic wéhenachah, ma joyáh bojoó. Páant í míic wéheat dedé pínah nihcah, chah í yéej chājbiipna caá. ¹⁷ Páant í yee bohéat, yahwít ã moóp aabát pah, bitadih í yéejana caá. Páant tigaá Himeneo, Fileto wüt jumnitbüt ít chājap. ¹⁸ Páant í yee bohéatdih joinít, Dios naáwát yoobátbih ít cádahap wut jí. Pánih cádahnit, “Jesúíhwā jáantjeh ítát púuh laab béjep be”, queét ít níj yee bohénap wut jí. Pánih mácah bohénit, biquína Jesúíhwādih í yéejanachah, caandíh ít cádahap wut jí. ¹⁹ Obohjeéhtih, páant í yee naóh bohénachah yuhna, Dios naáwátboó yoobópdih ã jumna caá. Caán ã túut nūmcán níit. Páantjeh bíic yoobó

* 2:12 1P 5.1 * 2:12 Mt 10.33; Lc 12.9

ã jumbipna caá. Nin pah Dios naáwátdih naóh yapani át niíj daacáp tajī: “Jwī Maáh áihwādh ā jéihna caá”, át niíj daacáp tajī.* “ ‘Jesús wā Maáh caá’, niijnítboó, yeejép ĩ chājatdih ĩ cádaha naáh”, biíhboó át niíj daacáp tajī.

²⁰ Jwiít Jesúfhwā nin pah caá jwī jumap: Búdí muúboó dawá pamapna ā jumna caá. Biquína oro, platajīh ĩ chājnjiji jum, biquína máa naá, wáam déepjīh ĩ chājnjibut ā jumna caá. Pánihna, caán muú mínah cáacwādh numah jeémpnit, áih oro, platajīh ĩ chājnjiji pamapnadidh wēi ennit, ĩ jeémát pínahdh ā cáagna caá. Obohjeéhtih, máa naá, wáam déepjīh ĩ chājnjiboó yeó jáap jumap pah jeémát cágat pínah, ĩ yohnidih ĩ yacat pínahbut ā jumna caá. ²¹ Pánihat pah, ded yeejép ā chājatdih cádahnit, oro, platajīh ĩ chājnjiji pamap panihni jumna, jwī Maáh ā weñat pínahdh ā jéih chājbiipna caá. Páant ā chājachah, jwī Maáh caandīh ā wēi enbipna caá.

²² Meémboó jáap jumna, japata ĩ yéj chāj ĩnihatdih enna, iinít, biáboó ma bejeé. Pánih iinít, túiniboodíhjih chājna, jwī Maáh Jesúsdih chah jenah joinít, bitadidh ma túi oyoó. Pánih oinit, míic jūihcanjeh, ĩjeéh ma túi jummuú. Nihat Jesúsdih túi úbhnitbut biíc yoobó ĩ chāja naáh.

²³ Jenah joicánnit ĩ míic jūihñuchah, ma joyáh bojoó. Beh joicánjeh, míic úbh joinít, queétjeh chah ĩ míic jūihna caá. ²⁴ Obohjeéhtih, Dios naáwátdih bohéniboodíh míic jūihcat caá náahap. Pánih jūihcan, nihatdih túi chājnit, túi bohénit, biíc mantjeh íjcan túinijeh jumap caá náahap.

²⁵ Ā naáwátdih joíhcan, mácah niijnítidih íjcanjeh túi bohéat caá náahap. Páant túinijeh ĩ bohénachah joinít, Dios ā teo wáacatjīh ĩ yap yohatdih cádahna, túini bohéat-boodíh “Caán yoobópdih caá”, ĩ niíj jenah joibíipna caá.

²⁶ Pánihna, yoobópdih bohéatdih joinít, queét nemépwā

* 2:19 Nm 16.5; Jn 10.14; 1Co 8.3

ĩ maáh ã náahat pah chãjnitji caandíh ĩ cádahbipna caá. Pánih cádahnit, ã jwúub yéej chãjat túutachah yuhna, yoobópdih bohéatdih jepahnit, ã wútatboodíh ĩ jepahcan níft, bũca.

3

Péeni yeó jáapdih ded pah cáacwã ĩ jummat pínah

¹ Bũũ, Timoteo, nindihbut ma túi náhninaa: Jesús ã jwúub dei jũúwát pínah játih, cáacwãdih búdí bũwat ã jummbipna caá. ² Caán láa, cáacwã bitadih teo wáacat pínahdih jenah joicán, ĩ weñat pínahdihjeh ĩ jenah joibípna caá. Pánih jenah joinít, dawá bíí déedih ĩ bidbipna caá. “Nihatdih jéihna, bitadih chah wã jumna caá”, níj jenah joinít ĩ jummbipna caá. Cáacwãdih, Diosdihbut yeejép wéhenit, ĩ mánadihbut yap yohnit ĩ jummbipna caá. Bitá queétdih ĩ túi chãjachah yuhna, “Túina caá”, níj cáannit ĩ jummbipna caá. Diosdih wéicanjeh, búdí yeejép chãjnit ĩ jummbipna caá. ³ Cáacwãdih oican, ĩ jígah en teo wáaccan níft. Yeejép doonádih naóhnit ĩ jummbipna caá. ĩ jenah joyátjrhjeh yeejépdih ĩ jéih chãj cádahcan níft. Cáacwãdih túbit yeejép chãjnit, túiniboodíh ĩ en iibípna caá. ⁴ ĩ chéenwãdih yuh bũca yeejép ĩ chãjbipna caá. Jenah joicánjeh chãjnit, “Jéih beedáni caá”, níj jenah joinít ĩ jummbipna caá. Queét ĩ weñat pínahdihjeh chãjnit jumna, Diosboodíh náahcannit ĩ jummbipna caá. ⁵ Cáacwã ĩ enechah, Diosdih túi wéinit pah jígohnit jumna yuhna, ĩ jenah joyátidih ã túut nũmát pínahdih ĩ náahcan níft. Pánihnitdih ma pej jumca bojoó.

⁶ Biquína pánih chãjnit bitáh mũnádih waadnít, “Dios naáwátidih yeebdíh bohénadih wã jũúwúp be”, caanjíh jumnit yaáhdhíh ĩpí níj yeena caá. Páant ĩ níj yeenachah yuhna, queét yaádh túi jenah joicánnit, yeejép chãjnit

jumna, i yee bohéatdih i wēi joiná caá. Queét yaádh búdí i yéej chājihna caá. ⁷ Pánihna, dedé mácah yee bohéatdih jóíhna, Dioíh yoobópdih bohéatboodíh i náahcan caá. ⁸ Jon játih Egiptodih moón jióhnitji, Janes, Jambres wūt jumnit, Moisésdih it yap yohíhip wūt yuh jī.* Páant i yap yohíhat pah muntih queét yaádhdih yee bohénitboó túini bohéatdih i en iiná caá. Queét yeejépdihjeh jenah joinít i jumna caá. Pánih jumna, Jesúsdihtái jenah joicán, áihwā yoobát i nihcan caá. ⁹ Queét i yee bohé jibichah yuhna, daocánnitjeh queétdih i jepahbipna caá. I yee bohéatdih “Caán yeejép bohéat caá”, cáacwā i níj jéihbipna caá. Janes, Jambresjīh i yeeatjidih jon játih moón i jéihyat pah muntih, Jesús ā jwúub dei jūúwát pínah játih jumnitbut i yeeatdih i jéihbipna caá.

Timoteodih ā jwúub wutat

¹⁰ Obohjeéhtih, ded pah wā bohéat, wā jummat, wā jenah joyátidihbut meemjéh ma túi jéihna caá. Jesúsdihtái jenah joyátidih, íjat wihcanjeh cáacwādihtái oina wā teo wáacat, yeejép yapna yuhna wā cádahcatdihbut ma jéihna caá. ¹¹ Weemdíh yeejép i chājachah, búdí wā yéej chūúatjidihbut ma jéihna caá. Antioquía, Iconio, Listra tútchinaboó Jesúh doonádih wā jib bohéat jíib, weemdíh yeejép i chājatjidihbut ma jéihna caá. Obohjeéhtih, i mawíhichah yuhna, jwī Maáh Jesúsboó weemdíh ā wápachah, i jéih maocap jī.* ¹² Páant weemdíh i chājat pah, nihtái Jesucristoíhwā caandíh i túi péeat jíib, bita queétdihbut yeejép i chājat pínahdihbut jwī jéihna caá. ¹³ Yeejépwā, yeenitbut chah yeejép chājnit i jumbipna caá. Bitadihtái yeena, queétjehbut i yeeatdih joiná, chah yeejép i jumbipna caá.

* 3:8 Ex 7.11 * 3:11 Hch 13.14-52; 14.1-20

¹⁴ Obohjeéhtih, ma éet, ma íin, weembát meemdíh jwī bohénachah joiná, meémboó mat túi jepahap wut jī. “Weemdíh bohénit yeenit nihcan caá”, niíj jéihnit, yoobópdih jwī bohéátjidih túi náhninit, ma pée cádahca bojoó. ¹⁵ Meém wébít jum láa, Dios naáwátdih mat jéih jwīhip wut jī. Pánih jéihnit, Jesucristodih túi jepahnit, iiguípna bejni déejidih Dios ā túi ubni ma jumna caá. ¹⁶ Dios naáwátdih nihat daácnitdih “Nin pah ma niíj daacá”, Diosjeh āt niíj daacát túutur wut jī. Pánihna, ī daacátjidih jwiítdih bohéat caá náahap, yoobópdih naáwátdih jwī túi jéihyat túut niijná. Pánih jéihnit, “Caán yeejép wā chājatdih cádahat caá náahap”, jwī niíj jéihna caá. Caandíh bohéna, túiniboodíh jwī jéih túut nuumná caá. Pánihna, yeó jáap jummat pah túi chājat túut niijná, ā naáwátdih bohéat caá náahap. ¹⁷ Ded Dios naáwátdih túi míic bohéna, nihat túinidih ā jéih chājbipna caá.

4

¹ Jesucristo, nihat cáacwā ī Maáh jwúub dei jūóhna, báadhnit, wunnitbut ded pah ī chājatji jíib ā naóhbipna caá. Pánihna, caán, ā íip Diosbut ī enechah, meemdíh nin pah wā wēp naóhna caá: ² Yeó jáap jummat pah cáacwā ī joíhichah, ī joíhcah yuhna, Dios naáwátdih páantjeh ma bohénaá. Pánih bohéna, cáacwā ī yéej chājatdih jéihyanit, “Jwúub yéej chājcanjeh, túiniboodíh ñi túut nuumá”, ma niíj naáwá. Pánih naóhnit, chucánjeh, queétdih ma túi bohé cádahca bojoó. ³⁻⁴ Túttimah bóo láa, cáacwā túini bohéatdih ī joíhcan niít. Pánih joíhcan, ī náahatdihjeh chājíhna, ī weñat pínah bohéatdihjeh joíhnit, mácah bohénitboodíh búdí ī bidbipna caá. Páant ī bidichah, dawá queétdih ī yee bohébipna caá. Túini bohéatdih cádahnit, mácah bohénit ī jenah joyátjīhjah ī bohéatboodíh ī joibípna caá. Pánihna, waícanjeh páant ā yapat pínahdih

jéihnit, meémboó Dios naáwát, yoobópdih jəmndih, ma bohé cádahca bojoó. ⁵ Pánih bohénit, queét yeenit pah chājcat túut niijná, túi jenah joiní ma jəmúú. Yeejép yapna yuhna, biíc yoobó chājnit, túini doonádih ma bohé cádahca bojoó. Pánih cádahcan, Dios meemdíh ã wutat pah ma túi chāj péanaá.

⁶ Weém Dios ã wutat pah, ã naáwát dih wā jib bohéatji jíib weemdíh ĩ mao yohat pínah bahnijeh caá ã jūdhdər.

⁷ Wā wunat pínah játih nin pah meemdíh wā naóhna caá: Jesúih túini doonádih Dios weemdíh ã bohéat túutachah, wā túi bohénap be. Nihat ã wutat pah wā chāj péanap be. Pánih chājnit, yeejép yapna yuhna, caandíh wā túi jenah joí cádahcap be. ⁸ Pánihna, wā túi chājatji jíib jwĩ Maáh jeáboó ã bíboh páina nacaá. Nihat cáacwā ded pah ĩ chājatdih jéih beedána, yoobópdih jíib wāhni jəmna, ã wutatdih wā túi jepahatji jíib, ã jwúb dei jūóhni yeó jáapdih weemdíh ã túi chāj bipna caá. Bitá caandíh oinitbut ã jwúb dei jūúwát pínahdih túi páinit ĩ jəmchah, jwĩ Maáh Jesús biíc yoobó queétdih ã túi chāj bipna caá.

Timoteo ded pah ã chājat pínah

⁹ Waícanjeh wā pebhna ma jūúwú. ¹⁰ Demas wūt jəmni chah dawá bíí déedih náahna, weemdíh cádahnit, Tesalónica tátchina ã jwúb bejep be.* Crescente wūt jəmni Galacia baácna ã bejehah, Tito wūt jəmni but Dalmacia baácna ã bejep be.* ¹¹ Páant ĩ yoh bejat tát-timah, Lucasjeh caá wājeéh ã chāwáp.* Pánihna, bitá teo wáacnitdih náahnit, meemdíh wā jūúwát túutna caá. Pánih jūóhnit, Marcosdihbut ma numah jūúwú.* Cristóih

* 4:10 Col 4.14; Flm 24 * 4:10 2Co 8.23; Gá 2.3; Tit 1.4 * 4:11 Col 4.14;

Flm 24 * 4:11 Hch 12.12,25; 13.13; 15.37-39; Col 4.10; Flm 24

doonádih wā bohénachah, weemdíh túi teo wáacni pínah caán ã jum̄bipna caá. ¹² Tíquicodih Éfeso tútchina wā wahap be.* ¹³ Ninna jūóhna, Troas tútchiboó* Carpo wūt jum̄nín̄h m̄udíh wā jwej jūóhni cúbuh jweyát chóodih, wíih papélah tólihnadihbut ma ub jūúwá. Wíih papélah núonadih bácah búdí wā náahna caá. Pánihna, caandíh-but ma ub jūúwá.

¹⁴ Alejandro wūt jum̄ni itahdíh teoni weemdíh búdí yeejép ã chājap be.* Páant ã chājatji jib Dios caandíh ã peéh chāj̄bipna caá.* ¹⁵ Caán Alejandro jwī bohéatdíh búdí ã yap yohna caá. Pánihna, caandíh ma túi chāja chaáh, meemdíh yeejép ã chāj̄cat pínah niijná.

¹⁶ Roma tútchidih moón ĩ maáta weemdíh ĩ jwíih úubh joyóchah, wā chājatjidih wā bohéatdihbut queétdih wā naáwáchah, det weemdíh teo wáacnit pínah ĩ wihcap be. Úum̄nit, nihat weemdíh ĩ cádah bejep be. Obohjeéhtih, páant weemdíh ĩ cádahachah yuhna, Dios queétdih ã peéh chāj̄ca bojo naáh. ¹⁷ Weemdíh páant ĩ cádahachah yuhna, jwī Maáh Jesúsboó ã teo wáacap be, áih doonádih wā naóh beedáát pínah niijná, nihat judíowā nihcannit ĩ joyát pínah niijná. Jiowá panihnit weemdíh ĩ mao yohat déedih ã túi wapap be. ¹⁸ Nihat weemdíh yeejép chāj̄nitdih yap yohnit, jwī Maáh weemdíh ã wapbipna caá. Pánih wapnit, jeáboó maáh ã jum̄apna weemdíh ã túi bejat túutbipna caá. Pánihna, yeó jáap jum̄at pah “Caán chah túini, chah wēpni Maáh caá”, jwī niij̄ jíih. Páant tií ã jum̄ nah.

Ã pée túyat tútat

* 4:12 Hch 20.4; Ef 6.21-22; Col 4.7-8

* 4:13 Hch 20.6

* 4:14 1Ti 1.20

* 4:14 Sal 62.12; Ro 2.6

¹⁹ Prisca, Aquila,* Onesíforo* ã pebh moonbát ĩ túyũ naáh. ²⁰ Erasto* Corinto tútchiboó ã chãwáp jĩ. Trófimo* Mileto tútchiboó tubúp chũúhnit, ã chãwáp jĩ. ²¹ Meémboó mah noój láa jãtih waícanjeh ma jũúwú. Eubulo, Pudente, Lino, Claudia, nihat bita Jesúíhwãbut meemdĩh ĩ túyat túutna caá.

²² Jwĩ Maáh Jesucristo majeéh ã jamũ naáh. Dios yeéb nihatdih oinit, ã túi teo wáaca naáh.

Páant bóojeh tigaá wã naáwát.

Pablo

* 4:19 Hch 18.2,18 * 4:19 2Ti 1.16-17 * 4:20 Hch 19.22; Ro 16.23

* 4:20 Hch 20.4; 21.29

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 12 Mar 2019 from source files dated 5 Mar 2019

34c9543b-57a6-5290-ab7b-4fa15529a7e2